

**Broj: 04-01-835-07/09**  
**Mostar, 22.01.2009. godine**

Na osnovu člana 41. Zakona o električnoj energiji („Službene novine Federacije BiH“ broj 41/02, 24/05, 38/05, 61/09), člana 12. stava (1) i člana 14. stava (1) Statuta Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 13/04), kao i člana 31. stava (2) i člana 37. stava (5) Poslovnika o radu Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 59/04), te člana 83. i člana 91. stava (2) Pravilnika o javnim raspravama i rješavanju zahtjeva i žalbi Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 37/05) i člana 23. Općih uslova za isporuku električne energije („Službene novine Federacije BiH“ broj 35/08, 81/08), a postupajući po Žalbi/prigovoru primljenoj u FERK pod brojem 04-01-835/09 dana 21.08.2009. godine žalioca Miralema Selimovića iz Kladnja, Regulatorna komisija za električnu energiju u Federaciji Bosne i Hercegovine – FERK je, na I redovnoj sjednici održanoj u Mostaru dana 22.01.2010. godine, donijela

## ZAKLJUČAK

1. Postupak po Žalbi/prigovoru primljenoj u FERK pod brojem 04-01-835/09 dana 21.08.2009. godine žalioca Miralema Selimovića iz Kladnja zbog nepostupanja u propisanom roku Javnog preduzeća Elektroprivreda BiH d.d. - Sarajevo, Podružnice „Elektro distribucija“ Tuzla, po Zahtjevu za izdavanje elektroenergetske saglasnosti podnijetom 09.09.2008. godine, obustavlja se u cijelosti.
2. Ovaj zaključak je konačan i stupa na snagu danom donošenja, te se objavljuje na oglasnoj tabli i web stranici FERK-a.

## O b r a z l o ž e n j e

U skladu sa članom 41. Zakona o električnoj energiji, proizvođač, odnosno kvalifikovani kupac električne energije kojem je odbijen pristup mreži ili je nezadovoljan uslovima za pristup, može podnijeti žalbu/prigovor FERK-u, što je propisano i članom 83. Pravilnika o javnim raspravama i rješavanju zahtjeva i žalbi FERK-a, te članom 23. stavom (1) Općih uslova za isporuku električne energije. Članom 23. stavom (2) Općih uslova za isporuku električne energije propisano je da se žalba/prigovor direktno predaje ili šalje poštom nadležnom distributeru u roku od 15 dana od dana prijema odluke distributera o zahtjevu za izdavanje prethodne odnosno elektroenergetske saglasnosti.

Na osnovu navedenog, 21.08.2009. godine FERK je pod brojem 04-01-835/09 primio žalbu/prigovor Miralema Selimovića iz Kladnja zbog nepostupanja JP Elektroprivrede BiH d.d.- Sarajevo, Podružnice „Elektro distribucija“ Tuzla u propisanom roku od 30 dana od dana prijema zahtjeva za izdavanje elektroenergetske saglasnosti, a koji zahtjev je žalilac podnio 09.09.2008. godine. Žalba/prigovor nije FERK-u dostavljena putem JP Elektroprivrede BiH d.d.- Sarajevo, Podružnice „Elektro distribucija“ Tuzla. Uz navedenu žalbu/prigovor podnosilac je dostavio Priznanicu o plaćanju troškova od

09.09.2008. godine, te je dostavio Potvrdu Općine Živinice, Službe za stambeno-komunalne i urbanističke poslove broj 05/5-23-10244/08 od 09.09.2008. godine o podnošenju zahtjeva za izdavanje naknadnog odobrenja za građenje.

Postupajući po podnesenoj žalbi/prigovoru, FERK je 08.09.2009. godine pod brojem 04-01-835-01/09 uputio JP Elektroprivredi BiH d.d.-Sarajevo, Podružnici „Elektrodistribucija“ Tuzla Zahtjev za informacijama kojim je zatražio da ista u roku od osam dana od dana prijema tog zahtjeva, u FERK dostavi sve informacije koje se odnose na žalbu/prigovor Miralema Selimovića, obrazloženje vezano za predmetnu žalbu/prigovor, a obzirom na protek vremena, da posebno pojasni iz kojih razloga nije još riješila po zahtjevu ovog žalioca, kao i svu kompletnu dokumentaciju na koju se poziva i kojom raspolaže, uključujući i propise (kompletne) koje je u svom radu primijenila u rješavanju istog.

Također, da bi FERK mogao u okviru svojih nadležnosti ispitati predmet ovog žalioca, FERK je istom uputio Odgovor broj 04-01-835-02/09 dana 08.09.2009. godine, tražeći da u roku od osam dana od dana prijema tog dopisa dostavi svu dokumentaciju i informacije na koje se poziva i kojima raspolaže, te kojima potkrijepljuje svoje navode, a posebno informacije o kakvom se zahtjevu prema navedenom elektroprivrednom društvu radi (obzirom da je uz žalbu/prigovor priložena samo Priznanica o plaćanju troškova od 09.09.2008. godine), zatim je li po tom zahtjevu od navedenog elektroprivrednog društva dobio ikakav odgovor, te ukoliko jeste, kako je postupio po istom. Osim navedenog, a u vezi žaliteljevog zahtjeva za odobrenje plaćanja priključka električne energije po starim cijenama od strane FERK-a, FERK je istog obavijestio da su nadležnosti i obaveze FERK-a taksativno propisane članom 14. i članom 15. Zakona o električnoj energiji („Službene novine Federacije BiH“ broj 41/02, 24/05, 38/05, 61/09), među kojima je i nadgledanje odnosa u elektroenergetskom sektoru, a da su se s druge strane, elektroprivredna društva, čije obavljanje elektroprivrednih djelatnosti FERK nadgleda, dužna pridržavati svih važećih zakona, podzakonskih akata, tehničkih propisa, pravilnika i standarda, te pravila i propisa FERK-a, kao i uslova izdatih dozvola, direktiva EU i međunarodnih ugovora, koje je prihvatila BiH, te da u tom smislu, FERK nema ovlaštenje u pojedinačnim slučajevima vršiti odobravanje zahtjeva kupaca, ali ima obavezu i ovlaštenje vršiti nadgledanje rada elektroprivrednih društava u primjeni važećih propisa prilikom rješavanja tih zahtjeva kupaca.

U povodu FERK-ovog Zahtjeva za informacijama broj 04-01-835-01/09 od 08.09.2009. godine upućenog JP Elektroprivredi BiH d.d.-Sarajevo, Podružnici „Elektrodistribucija“ Tuzla, ista je dostavila Dopis – dostava informacija po zahtjevu primljen pod brojem 04-01-835-03/09 dana 18.09.2009. godine. U tom dopisu je ovo javno preduzeće navelo da su uslovi i postupak izdavanja elektroenergetske saglasnosti definisani Općim uslovima za isporuku električne energije, koji su objavljeni u „Službenim novinama Federacije BiH“ broj 35/08 i u primjeni od 01.07.2009. godine, te da u skladu sa navedenim aktom Podružnica „Elektrodistribucija“ Tuzla prima i vrši obradu zahtjeva za priključenje objekata, koji imaju uredno i blagovremeno izdano odobrenje za građenje. Navedeno je i da pored toga, na području Tuzlanskog kantona ima preko 19.500 nelegalno izgrađenih objekata, čija se legalizacija i priključenje na elektrodistributivnu mrežu vrši u skladu sa Zakonom o izmjenama i dopunama Zakona o uslovima i postupku legalizacije bespravno

izgrađenih građevina („Službene novine TK“ broj 5/08). Navedeno je i da je, osim redovnih zahtjeva, ova Podružnica primila veliki broj zahtjeva za izdavanje elektroenergetskih saglasnosti po osnovu legalizacije bespravno izgrađenih građevina, što predstavlja ogromno povećanje u odnosu na normalan režim rada prijema i obrade zahtjeva, te da Podružnica „Elektrodistribucija“ Tuzla ne raspolaže s materijalnim i ljudskim resursima da priljučenje nelegalno izgrađenih objekata, koji su građeni proteklih 10 godina i više godina, riješi za nekoliko mjeseci ili samo za jednu godinu, tako i da se samim time, obrada svih predmeta i izdavanje elektroenergetskih saglasnosti ne može izvršiti u željenom vremenskom periodu. Navedeno je i da su u cilju rješavanja što većeg broja zahtjeva, zaposlenici Podružnice „Elektrodistribucija“ Tuzla uložili maksimalne napore radeći i van redovnog radnog vremena, međutim da izvjestan broj zahtjeva još uvijek nije obrađen. Dalje je navedeno i da zahtjevi za izdavanje elektroenergetskih saglasnosti koji imaju uredno i blagovremeno izdato odobrenje za građenje, imaju prioritet prilikom redoslijeda obrade predmeta, te da će, s obzirom da objekat žalitelja nema izdato odobrenje za građenje i da se legalizacija i priključenje na elektrodistributivnu mrežu ovakvih objekata vrši u skladu sa Zakonom o izmjenama i dopunama Zakona o uslovima i postupku legalizacije bespravno izgrađenih građevina, predmet žalioca Miralema Selimovića biti obrađen u skladu sa redoslijedom primljenih predmeta i važećim Cjenovnikom usluga JP Elektroprivreda BiH d.d.- Sarajevo na dan obrade predmeta.

U vezi sa navedenim, FERK je 16.10.2009. godine uputio JP Elektroprivredi BiH d.d.- Sarajevo, Podružnici „Elektrodistribucija“ Tuzla dopis – Izdavanje elektroenergetske saglasnosti broj 04-01-835-04/09. S obzirom na razloge koje je ovo javno preduzeće navelo u svom dopisu, a zbog kojih nije odlučilo o predmetnom zahtjevu za izdavanje elektroenergetske saglasnosti u propisanom roku, FERK je na osnovu Općih uslova za isporuku električne energije („Službene novine Federacije BiH“ broj 35/99), te člana 83. i člana 91. stava (2) Pravilnika o javnim raspravama i rješavanju zahtjeva i žalbi FERK-a, zatražio da JP Elektroprivreda BiH d.d.- Sarajevo, Podružnica „Elektrodistribucija“ Tuzla bez odlaganja, a najkasnije u roku od 15 dana od dana prijema tog dopisa odluči o zahtjevu za izdavanje elektroenergetske saglasnosti žalioca Miralema Selimovića iz Kladjna, uz obrazloženje razloga takve odluke, u skladu sa pozitivnim propisima, s uputstvom o pravu na žalbu/prigovor, te da o istom pisanim putem bez odlaganja obavijesti i FERK.

Kako JP Elektroprivreda BiH d.d.-Sarajevo, Podružnica „Elektrodistribucija“ Tuzla nije postupila u određenom roku u skladu sa navedenim dopisom FERK-a broj 04-01-835-04/09 od 16.10.2009. godine, FERK je istoj uputio Urgenciju broj 04-01-835-05/09 dana 23.11.2009. godine.

FERK je 02.12.2009. godine pod brojem 04-01-835-06/09 primio od JP Elektroprivreda BiH d.d.-Sarajevo, Podružnice „Elektrodistribucija“ Tuzla Dopis – Informacija o izdavanju elektroenergetske saglasnosti po žalbi Miralema Selimovića iz Kladjna. Ovim dopisom je navedeno javno preduzeće obavijestilo FERK da je JP Elektroprivreda BiH d.d.-Sarajevo, Podružnica „Elektrodistribucija“ Tuzla 02.10.2009. godine žaliocu izdala elektroenergetsku saglasnost broj 208-6074/09, da je ista izdata u skladu sa Općim uslovima za isporuku električne energije („Službene novine Federacije BiH“ broj 35/08, 81/08) i članom 27. Pravilnika o priključcima JP Elektroprivreda BiH d.d.

-Sarajevo, na koji je saglasnost dao FERK. Navelo je i da je 20.10.2009. godine žalilac Miralem Selimović sa distributerom potpisao Ugovor o priključenju na distributivnu mrežu broj 208-6822/09, te da je 17.11.2009. godine izvršio uplatu prvog dijela jednokratne naknade za priključenje na niskonaponsku mrežu. U prilogu tog dopisa je dostavljena izdata Elektroenergetska saglasnost broj 208-6074/09 od 2.10.2009. godine, te spis predmeta.

Budući da je JP Elektroprivreda BiH d.d.-Sarajevo, Podružnica „Elektrodistribucija“ Tuzla po Zahtjevu za izdavanje elektroenergetske saglasnosti žalioца Miralema Selimovića izdalo Elektroenergetsku saglasnost, te da FERK u okviru svojih nadležnosti postupke rješavanja žalbi/prigovora vodi u skladu sa članom 91. stavom (2) Pravilnika o javnim raspravama i rješavanju zahtjeva i žalbi FERK-a, ispunjeni su uslovi za obustavu postupka u cijelosti.

Na osnovu svega navedenog, a u skladu sa članom 29. Zakona o električnoj energiji, odlučeno je kao u dispozitivu zaključka.

**POUKA O PRAVNOM LIJEKU:**

Protiv ovog zaključka strane u postupku mogu tužbom pokrenuti upravni spor kod Kantonalnog/Županijskog suda u Mostaru u roku od 30 dana od dana prijema zaključka. Tužba se predaje sudu izravno ili mu se šalje poštom preporučeno. Tužba se može izjaviti i na zapisnik kod navedenog suda ili bilo kojeg drugog suda.

**PREDSJEDNIK FERK-a**  
**Zdenko Šimunović s.r.**